

Carta Abierta pa: Luis S. de Cuba

di: Tico Croes

Colega,

Ningun momento ta mi intencion di cuminzá un correspondencia cu Bo riba e tópico di e impuesto cu Bo gobierno tin intencion di planta riba pueblo, pero naturalmente mi no por laga colgá cu loke bosonan kier haci cu pueblo por tin lo mínimo di hustificacion.

E hecho cu mi a yamabo político nobo mientras cu bo kier men cu bo ta riba lista di MEP desde 1985 y cu bo a bai riba lista di MEP riba invitacion di difunto Betico Croes, ta un error di "slordigheid" di mi banda.

Loke cu mi tabata kier men tabata cu awor cu bo ta un Parlamentario nobo. Mea Culpa. Sí mi ta kere cu ta importante pa resaltá e hecho, ya cu bo ta considerá un honor cu ta riba invitacion di difunto Betico Croes bo a bai riba lista di MEP, cu awor mas cu nunca na víspera di e medidanan cu bo gobierno kier introducí pa castigá nos pueblo, mester recordá su palabranan profético pa Nel Oduber na 1984 cu e mester baha, pasobra e ta zink Aruba.

Si bo mira cu wowo habrí kico ta sosodiendo awor, bo lo ta di acuerdo cumi cu difunto Betico Croes, si e tabata na bida awe, lo a ripití e mesun palabranan aki.

A). Ora bo bisami cu si tin corrupcion, ladronicia y mentiran den e gobernacion cu bo ta sostené, mi lo mester acudí cerca Ministerio Público, ta un zet político di e mentalidad di awe cu tin MEP venená.

Abo tambe sa cu si bo duna swa of ruman un promocion den gobierno esaki ta corrupcion, pero no tin ningun polis cu ta sera bo.

B) Bo tambe sa cu si bo pone 1200 of 2 mil amigo político riba payroll di gobierno, pasobra nan a yudabo den campaña, bo ta hortando placa di pueblo na un manera sin escrúpulo, pero no tin ningun polis cu por serabo.

Bo observacion cu ta 1200 hende so a worde hincá den gobierno ta sona como si fuera esaki ta e cos di mas normal den mundo. Cu e ta costa nos pueblo alrededor di 80 miyon florin extra pa aña ta sona como algo irrelevante pabo.

Esaki ta e diferencia di mentalidad entre nos dos partido: pa AVP cada sèn di nos pueblo ta algo sagrado y por lo tanto mester cuidé cu tur dedicacion.

C) Ademas bo ponencia cu ta trata aki di trabao pa tata di famia, lo tabatin tur validez, si encaso cu aki na Aruba tabata reina desempleo y cu gobierno por lo tanto mester a cumpli cu un funcion social y humanitario. Pero esaki no ta e caso.

Aruba tabatin trabao pa tur Arubiano cu ta deseá esaki y e único cos cu boso a haci den e 4 añanan aki tabata kita trahador

for di sector privá y hincá nan den gobierno pa logra haya voto y importá un gran cantidad di stranhero pa haci e trabao cu e hendenan aki tabata haci. No a importá boso cu esaki no solamente a causa cu pueblo mester paga mas placa pa tur e hendenan cu boso a pone den gobierno, y cu boso de paso a crea tambe un problema social grandi cu e presencia di un gran cantidad di trahador stranhero.

Cu e trahador Arubiano a perde oportunidad, cu e no por haya un mihor salario y cu e Arubiano di awe ta biba menos sigur cu antes no ta importá bo gobierno. Pa esaki tampoco tin polis pa sera un hende.

D) Abo tambe sa cu ora negoshi a ser hací cu permiso di trabao pa stranhero, y cu a proba esaki den caso di oficina di abogado di ex-Minister di Husticia, y cu a bende auto di pueblo pa 5 florin na amigonan político tampoco tin polis pa serabo.

E) Si bo bisa cu e garantíanan ta e motibo pa tuma medida, mientras di otro banda bo mes ta admití cu nan no a costa ningun sèn preto ainda, e ora esaki ta un mentira flagrante, pasobra e medidanan ta pa paga gastonan cu tin awor, manera cu e propio rapport di expertonan di 4 di Juni 1993 ta indicá, y no pa gastonan di futuro.

Den e mesun situacion caótico financiero pa no reservá ningun sèn pa garantía e aña aki. Si gobierno ta deseá, gobierno por cuminzá reservá placa na 1994, segun e comision. Bo ponencianan anto ta basá riba puro mentira, segun e propio comision.

F) Pa loke ta trata e garantíanan mi kier enfatizá pa mihor bo gobierno no paga ningun sèn riba nan pasobra no tin ningun mester. E Italianonan ta pagando e placa cu banconan ta cobrando, pasobra nan tambe sa cu fuera di e gobierno di MEP, cu a boycoteá tur proyecto di turismo y no a controlá e construccion di e hotelnan aki, nan tambe ta cómplice den e escándalo di e proyectonan.

AVP ta exigí pa promé cu paga un sèn na cualkier garantía duná dor di gobierno di AVP pa acercá Staten promé pa Staten aprobá e pagonan aki. Nos lo mira kendenan lo entregá un biaha mas na multinacionalnan stranhero.

Colega, bo reaccion a confirmá e mentalidad cu mi tabata teme cu lo a sali na cla, y cu ta cuadra completamente cu e mentalidad di MEP cu awor pa di dos biaha ta zink nos país. Tempo lo muestra cu bo escogencia tabata erróneo. Pueblo lo no tolerá hamas e belasting di ladronicia cu boso kier introducí.

Mi fé den e pueblo aki t'asina grandi cu mi ta sigur cu pueblo lo no permití pa boso zink Aruba atrobe. Pueblo lo tuma den su man e autoridad cu e tin pasobra pueblo ta e único soberano. □